

香山縣志卷之七

知香山縣事申良翰纂修

邑人何鑑編輯

人物志總序

名臣列傳

名賢列傳

孝子列傳

高士列傳

義勇列傳

列女列傳

耆壽列傳

序曰孔子曰十室之邑必有忠信香雖下邑然山川之所孕結代有偉人崛起臣品無論尊卑士行女貞無論常變莫不惇倫植節修行砥名與日月爭光雖間有越乎中道如割股廬墓未嫁守貞能人之所不能不免賢者之過要皆根於天性發乎至誠不要名不炫異將以風厲末俗亦曷可少哉忠信常有好學不常有孔子之所謂學非如後世之通經取科第抑

香山縣志

卷之七

一

學前人之嘉言懿行而已灤城蕪氏以為誘民之法遠莫如近近莫如其所與競近而所與競熟與里閭族黨之賢人君子表而出之使來者慨然而興起不亦善乎作人物志第七

名臣列傳

漢陳臨字子然建安時人也郡舉孝廉官至蒼梧太守  
推誠而理導人以孝悌民有遺腹子為其父報怨殺人  
者為吏所獲臨知其無嗣令其妻侍獄中後產一男郡  
人歌曰蒼梧府君恩廣大能令死囚有後代後徵為廷  
尉歿郡人以五月五日祠臨東城門上令小童潔服舞  
之其後子孫蕃盛播於嶺徼世以為陰德所致云  
唐鄭愚家世殷富騶童布滿谿谷皆紕衣鼎食愚幼穎  
力學嘗作詩曰臺山初罷霧岐海正分流漁浦颺來笛  
鴻逵翼去舟隱然有濟川之志識者知其公輔器也開  
成二年登進士釋褐秘書省校書郎累遷尚書郎咸通  
初為桂管觀察使所至廉察吏弊闔境肅然三年嶺南  
西道節度使蔡京苛慘淫刑為邕州軍士所逐詔以愚  
代之瘡痍嗷嗷方撫循不暇會南詔入寇安南都護蔡

香山縣志

卷之七

二

襲告急勅發荆南湖兩道兵二千桂管義征子弟三千  
詣邕州受愚節度而嶺南東道又奏蠻兵必向邕州宜  
先保護未可馳赴乃勅愚分兵備禦而所發諸道兵竟  
不進襲又奏求益兵愚支捍半載邕州得免無虞朝廷  
復督責之愚乃自言儒臣無將畧請任武臣於是詔義  
武節度使康承訓代為節度使發荆襄洪鄂四道兵萬  
人與<sup>之</sup>俱往救襲則已無及矣承訓上言愚在鎮善禦  
守狀朝廷於是始知愚之功詔為禮部侍郎咸通八年  
知貢舉舊制詩賦多出古句為題士習蹈成篇時詔放  
雲南子弟還國愚以此試之士多闕筆及放榜鄭洪業  
第一人及第輿論咸頌其公云黃巢平後廣州殘破僖  
宗中和初命愚出鎮南海以撫綏功召拜尚書左僕射  
後三載愚薨無子詩文多散逸不傳僅見一二首則皆  
竒作也初愚之涖桂也同平章事魏公崖鉉在荆南愚

以鉉負海內重望乃袖文卷着錦半臂謁之鉉訝愚自  
為進士未嘗以文章及門寘案不視惟留夜飲愚辭出  
更衣宿從竊謂此去應是慚其不稱耳既而復易紅錦  
就席尤加煥麗衆莫能測鉉因愚出閱其所業嘆賞至  
再曰真銷得半錦臂也

宋梁杞延福里人性醇謹好學通五經慶曆六年登進  
士初為連州司理獄獄詳明及為桂陽令泣政以惠民  
為本恤孤寡抑奸滑作陂池教種藝平賦役弭盜賊庶  
務悉舉虔商有擾市廛者設方畧毆逐之邑以大治嘉  
祐中遷比部員外郎尋以朝奉郎通判鄂州軍事俗尚  
巫鬼為置局醫斥去淫邪陋俗為之一變熙寧初致仕  
與運判徐九思建議請立香山為縣事不果行然自是  
之後竟成縣治鄉民便之啓其端者杞也是時海曲族  
望稱陳梁二家而杞家聲尤著稽其譜牒顯仕者十餘

香山縣志

卷之七

三

人散在他邑凡千餘指經略使仲簡序之其裔孫現係籍  
番禺嘉熙二年進士知南康作興學校輟俸增祭器政  
暇課試諸生舉行射禮民懷之

馬南寶沙涌人家饒於財而能讀書好義尤工於詩景  
炎二年十月端宗自潮州之淺灣航海過邑境南寶獻  
粟千石以餉軍端宗勅獎之召拜權工部侍郎時帝舟  
為元師所迫十一月丞相陳宜中少傅兼樞密副使張  
世傑殿前指揮使蘇劉義奉帝幸香山暫宮於南寶家  
南寶竭力保衛帝躬勞瘁備至元人無知者居數日元  
兵陷廣州諸將召募潮居里民數百以行南寶謂諸將  
曰功成之日當以奉迎孝恭懿聖皇帝為先因飲諸將  
酒曰痛飲黃龍府在此行也遂歌岳武穆直擣長驅之  
句以相風勵慷慨激烈聞者莫不壯之帝舟將復駐淺  
灣時猶未至元將哈刺歹及宣府梁雄飛招討王天祿

等來襲世傑等與戰於香山島敗績戰艦符印多為所奪將士被執者甚衆陳宜中所統衆尚數千人舟八百艘走秀山中流大風壞舟衆多溺死宜中僅以身免十二月張世傑奉帝舟退保秀山尋次於井澳丙子颶風大作舟敗幾溺帝遂得驚悸疾旬餘諸兵士稍稍來集死者十四五元將劉深復襲井澳世傑力戰却之陳宜中欲奉帝走占城乃先往諭意遂逃去南寶聞之慟哭曰丞相必不返國事危矣後果然景炎三年春都統凌震復廣州南寶賦詩志喜時帝舟次於化之碭洲疾大作四月帝崩於碭洲衛王昺即位走厓山張世傑等從之而曾淵子克山陵使奉帝還殯南寶家偽為梓宮出葬其實永福陵在厓山也今邑之深山多陵迹蓋遺黎為之諱其葬處云南寶方赴厓山會阻病旦夕謔語未嘗忘也宋亡悲憤不食元人籍仕宋者南寶匿姓名嘗

香山縣志

卷之七

四

作詩有目擊厓門天地改寸心難與夜潮消之句又曰衆星耿耿滄溟底恨不同歸一少微聞者哀之相傳端宗臨幸時丹荔方熟帝摘一枝其後經摘處風味獨殊人以為異已而元兵欲屠潮居里人為南寶危之而南寶恬不為動竟以壽終

明盧瑞字廷圭厓州人少穎悟從同舍先輩曾賢游有聲庠序時稱曾盧正統甲子鄉薦與賢名在上第計偕北上賢道喪明瑞念母老在堂需祿養遂就職得橫州學正因送賢至家而後奉母就養人皆躉之瑞善講經士皆解頤任內三科舉子十三人進士一人前此未有也學宮久圯州守倅以白金四百兩屬瑞重建比落成規制視舊有加焉人皆美其有治材薦補守缺不果用以內艱歸橫士從而卒業者十數人服闋改高唐州州久無甲第瑞擇其秀穎者加意教之三年中得進士

二劉魁為御史梁鏞為給事中 人每謂人曰吾輩非  
盧先生不至此秩滿士子羣送至二三百里亦有抵京  
師而後返者考最擢思恩府學教授思恩乃羈縻州郡  
立學未久僮人不能華言言必待譯瑞諄諄訓諭無少  
厭倦用是積久而通貢入大學者與柳慶無異岑英以  
土人為知府頗知書以宦遊士夫多求索往往輕之獨  
于瑞加敬歲饑從瑞請發倉賑之民賴以甦會缺同知  
衆曰盧先生生我我無以為報請于英乞以瑞補英遂  
聞于朝然已有岷府長史之除矣瑞至藩王與世子皆  
尊禮之僚屬卒隸受約束惟謹上下各得其驩心歲餘  
卒于官年五十四後藩府有事逮至都御史劉魁適典  
獄事訊及其人咸泣曰使盧長史在豈有是哉  
黃瑜字廷美仁厚坊人幼聰穎明尚書景泰丙子舉於  
鄉入成均以經術為一時冠天順癸未歷事戶部疏六

事上之一曰正身則天下治二曰正家則天下定三曰  
正禮則天下化四曰正樂則天下和五曰正稅賦則天  
下富六曰正軍伍則天下安七曰正刑罰則天下安  
賴吏部尚書王翱戶部侍郎薛遠採之而免行取御史  
臺銓部已奏名矣其夜有俞姓者奪之殊不色愠曰吾  
名類彼姓安知始非錯邪成化己丑乃授長樂知縣廣  
與惠隣郡曰吾鄉人蒞鄉人先化而後正之乃首捐俸  
遷建學校日與學官子弟講明經史時科目闕有間矣  
自是曾瓊林廣連舉於鄉兄弟有相訟者開導以因心  
之義皆涕泣受教退讓而去義官李允擒劇盜盧公林  
至謂曰盍為良民乎曲諭數四即破械放之允叩頭爭  
曰此賊為害數十年矣縱放則流害茲大笑曰彼良心  
已動森不可遏非汝所知也公林果革心力田永不為  
盜豪民殺人匿其屍訊不詞服法司欲從疑釋因請自

訊忽蚱蜢折左股斃于硯謂曰汝折其左股沉黑水池中神告我矣氓驚服其洗冤燭奸此類也以勁直忤當道浩然求去民攀留不可則立其生祠歸途經黃土嶺向所化盜盧公林者率子弟親肩其輿過嶺其剛而能感如此既歸徙居會城番山下手植槐二構亭吟嘯其中自稱雙槐老人曰子孫能更植其一則吾志畢矣蓋希蹤三槐也為學以存誠為本嘗自誦曰不欺心不欺人內外而一之誠之不然而徒有文章事業終小人耳置朱子語類及唐音杜詩于卧所晨起讀語類以析名理暮則咏詩數章而後就寢于聲色紛華一無所好卒年七十有三所著有雙槐集及歲抄藏于家

黃鑰字世美黃梁都人成化乙未進士授大理寺評事審獄有能名陞廣西按察司僉事弘治初間住家居會鬱林陸川寇起詔鑰軍門聽用定鬱林博白流民幾三

千戶清無徵稅米二千石襲殺歸化賊郭公才等與陶魯歐磐皆威行夷獯以功復前職改江西按察司僉事分巡南昌道擒瑞州賊王宏湖廣賊姚明禮俱散其黨都御史劉大夏總督兩廣以鑰嘗有功廣西乃薦陞副使整飭柳慶南寧等處兵備兼分巡右江道蒞任旬餘卒

盧淵字光潛晚號釣叟成化丁酉舉於鄉甲辰成進士授江西新淦縣政暇與多士論文每至夜分不休隣封遠近之士咸北面焉嘗與郡守議地方利弊語多抗激守不懌因謂之曰朝廷設官尊卑相馭大小相維未聞等級不辨也淵抗聲應之曰官不論尊卑期於盡職事關民社豈容緘默如以任事為侵官盡言為犯上恐非朝廷命官之意語畢趨出即求解組歸以詩文自娛有釣叟集行世

黃佐字才伯號泰泉生而穎異四歲受孝經及就外傳問曰大學自綱領條目之外何以釋本末而不及終始師不能答年十二成舉子業乃更學為古文詞詩賦學使者以孔氏遺書命論題佐謂曾子發堯舜之所未發者慎獨是也拔置第一自是廣稽博覽至忘寢食嘆曰孔門之道知行並進知為行之始行為知之終偏廢者均病也正德庚午領鄉薦第一庚辰以失路引不得與會試大宗伯毛澄小宗伯王瓚咸重佐特許之同考太史張衍慶得佐文置第一大學士石瑤病其專抑置第十八是時武宗南巡不及廷對明年世宗即位五月臚傳大學士蔣冕閱佐卷又擬第一同官楊廷和以其所言切直抑置二甲及選館職五試皆第一時乾清宮告成蔣學士命賦之位倚馬萬言授編脩時世宗初政即上初政要數事又上脩舉新政疏皆留中會試克同考

官所得士皆一時知名康陵既祔大禮議興禮官毛澄議兄終弟及無追尊之禮宜仿漢定陶王故事佐主其說署名牘尾異議者以為黨因力請終養會冊封南渭王克岷府副使事竣歸即疏奏陳情不報秩滿覃恩佐曰可以養母矣疏求歸養又不報疏凡三上得俞旨乃出路河渡大江訪大中丞王守仁於越論及良知佐曰知猶目也行猶足也雖乃一時俱到其實知先行後守仁曰君太信宋儒佐曰知之非艱行之為艱豈宋儒耶夫子亦曰知之未嘗復行也守仁嘆曰直諫多聞吾益友也家居奉母無何以年例出佐江西僉事佐聞命就道疏乞養母不報隨補廣西提學佐屢疏不已或謂曰君命數臨義無屢請恐反為太夫人憂奈何佐乃強起抵蒼梧謁軍門舊謁者必跪佐長揖撫臣不悅甫抵任與諸生發明理一分殊之旨輯理學本源諸書頒行

郡邑嚴士習撤淫祠行射禮舉節孝立鄉社以風勵之  
由是西粵士風丕變其後聞母病棄官歸撫臣劾之大  
學士李時薦佐有程朱之學宜克經筵世宗亦知佐名  
遂令致仕時象山之學徧天下多指考亭為支離佐語  
學者曰朱子有萬世不易之定論有一時荅問之言偶  
記於傳註而非定論者如易曰一陰一陽之謂道本義  
曰陰陽迭運者氣也而其理則所謂道此定論也若註  
中庸太極圖說語類採入性理大全者則非定論也作  
格物說諸篇樞部薦佐才可大用垣中董進第等以遺  
逸薦禮臣呂柟以宮僚薦皆為議禮者所沮然上思李  
時薦佐欲用之一日幸平臺以問閣臣夏言曰可遂以  
春坊司諫起佐於家比至京師即上九經政要疏草儲  
訓書以閣臣沮不果上尋克經筵講官侍讀掌南院事  
遷諭德脩撰同脩玉牒再遷南京國子監祭酒比辭闕

香山縣志

卷之七

八

廷至南雍頒五倫條約禁起撥清廩餼以給諸生出舊  
著樂典使肄習學士張治曰樂典一書蕭韶九成可復  
作也佐始為此書夢夫子告以知崇禮卑之說積思二  
十年始克成之無何太夫人卒於官舍扶襯南歸服闋  
進宮詹學士入西苑見閣臣夏言惟再拜議河套事夏  
遜其通達然益不悅或勸佐委蛇從時佐曰爵懸於君  
命懸於天道長時也道消亦時也吾惟與道偕行而已  
遂決意乞休卜築崑山之陽四方士雲集復請講學因  
做白鹿故事日錄所聞曰庸言居嘗語諸及門曰詞章  
之說勝始有無用之文虛寂之說行始有無文之學魯  
論示人篤信好樂始乎說樂不愠終乎知禮知命知言  
必真知之必誠行之乃成君子遊其門者人見之必推  
曰泰泉先生弟子也年七十有七將易簣猶講易繫曰  
自天祐之吉無不利當以王弼註為是援筆作四言詩



有氣完光岳身在雲霄之句謂門人曰弘毅之學當如是也言訖而逝贈禮部右侍郎遣官諭祭謚文裕所著有詩文集六十卷樂典三十六卷詩經通解二十五卷春秋傳意十二卷庸言十二卷鄉禮七卷革除遺事十六卷翰林記二十卷廣州府志六十卷廣東通志七十卷香山志八卷小學古訓姆訓兩京賦敷教錄各一卷劉士騰字于朝大欖人幼穎異讀書過目成誦年二十二舉<sup>嘉</sup>午鄉薦就淮安安東教諭壬子分典浙江鄉試遷知安仁縣縣當孔道苦送迎士騰繪圖上獻請節費省役以恤民疲報可卽劄諸石豎縣門及紫雲驛上民賴蘇息治多水患鑿渠導於錦江以決其暴積患由茲止至今名曰劉公渠

楊維震字孟起補邑弟子員湛深經術以博洽入國學六館生成推服咨移吏部選授福建沙縣縣丞維震曰

### 香山縣志

### 卷之七

九

承佐令行政者也自人不以道任其職遂為世所輕何職之不可行道耶政事之暇讀書談文與沙士之知名者日相倡和縣令間以事相遺一無所染御史廉知其績特為疏薦嘉隆間薦丞自震始

何派行字方洲小欖人嘉靖辛丑成進士以部郎晉太僕寺卿奉勅按視山西馬政具疏清釐額馬一時權貴咸畏之舅氏某至其地闕說官事謝絕之立促使歸里後乃長跪請罪其介性如此

袁三接字平洲為諸生貧苦嘗抱卷伊吾就隣家燈火晝夜不少輟嘉靖辛酉舉于鄉壬戌成進士司理廬州有平允聲入為戶部主事應酬游燕一切謝絕日夕惟考覈部事得失每呈堂稿多所爭執久歷郎署轉光祿少卿尋晉應天府丞又二年晉順天府尹萬曆初大璫銳意開採珠池夜半遺書訪珠池之利三接艷然變色

就燭前焚之越日伏闕疏論開採大為粵害民生愁怨盜賊釀起皆由于是設使朝廷欲得珠不過煩部檄一紙下地方官自可得報上命耳安用中涓為由是寢議未幾中使李鳳復以開採驛騷粵地而三接已卒時論追惜之

何述忠字惺字小欖人與弟述瓚同舉嘉靖甲子鄉闈少有夙慧父世睿嘗與友人借瞿昆湖全場卷授之覽一過默書一字不失家無藏書古今文詞成就坊間閱歸錄之生平讀書等身無遺忘者十上公車母容氏勉以祿養萬曆辛丑謁選浙江温州府判意每鬱鬱不自得至則進父老問地方阨塞振飭之尤重名節捐俸新顏真卿祠自為文表章林景熙唐珏遺事常進諸生講學出豆羹共飯其誠朴如此郡有疑獄經二十年屢獄不結直指檄述忠覆勘畫得其寃狀闔郡稱平未幾奔

香山縣志

卷之七

十

母喪回里甘貧樂道監司某故門下士式閭請謁欲有所獻不敢言而止終其任一無所請托惟受其表門一榜曰東甌遺愛而已享年八十有八祀鄉賢

鄭邦棧蓮塘人性孝友未冠補弟子員高等稍長授徒講學遠近宗之執經者數百人邑侯周行命其子弟師之曰濂洛之傳端在此矣居父喪哀毀骨立既葬廬墓三年過諱日水漿不入口已誕辰益哀思雖年逾九十不許孫子觴祝蓋終身孺慕然也以拔貢知廣西荔浦縣縣僻西陲民素頑犷而長吏亦以地遠便為姦利多無名之征以故民益怨上習為刁悍邦棧至一以德化道之蠲額外之征春秋履畝勸課農桑不期月而其民化捐俸飾學宮勵諸士以文藝前此科名寂然是年邑生劉大業遂擢高第近縣土司恃險遠每奪民田舍奴役之邦棧為理論清復民田數千畝有以威剗其民為

臧獲者悉復之士民為建革雜稅碑構勸農亭以示不忘之意家居禮請鄉飲賓者凡十有九時萬曆中鄉評猶為近古邑中雖有耆年舊德無敢先邦杖者唐政字文和麻洲人萬曆乙酉舉於鄉數上公車以親老祿養為急就應天縣教諭迎養父至儀真道喪政哀毀踰禮杖不能起扶襯歸葬并葬其世數喪服闋補廣西永淳縣教諭陞湖廣光化縣令再陞雲南順寧府通判政坦懷接物至誠率躬民不忍欺御史薦政卓異會母喪擗踊就道廢辭謝禮御史復命以法士民控軍門為訟寃既歸絕意仕進以詩賦自娛年八十有一

鄭士熙字我純濠頭人本浦江人先世宦粵遂家馬性仁孝幼失怙哀動路人奉母教惟謹事前母長兄友愛尤篤兄業農借之田間夜歸鬼物逢之却走人以為異

香山縣志

卷之七

十一

讀書攻苦不少輟同舍生強之嬉戲正色告曰兄力田以糗糗食我我耕硯忍以鹵莽報乎弱冠隸于庠萬曆二十一年拔貢謁選得潮陽學博以端士習正文體為急于儔人中識拔吳道坤為諸士矜式遣二子一龍一岳從之游遷山東長清令會歲荒民饑輒開倉借賑復念溝瘠未甦不忍追逋時巡方覈報不償將以白簡從事士熙恬然曰幸存活已多一官奚惜乎百姓聞之爭相輸旬日而足調湖廣城步縣先是縣中有橫征嘗例革除之勒石示禁每出童子百十人迎拜馬首曰公實生我士熙笑撫之署中飲水茹蔬及投老歸里家徒壁立晏如也有侵其祖塋者邑尹廉得實欲置之法且檄令他徒士熙止之曰彼誠不直死者何知尹嘆息曰先生可謂至德矣

毛可珍字美仲原名元鎧其先耒陽人洪武間從軍入

粵後征賀縣有功授香山百戶因家焉生而端慤數歲  
舉止如成人稍長有聲庠序萬曆癸卯舉於鄉知諸暨  
縣縣在萬山中夙稱難治可珍月吉讀法進父老講仁  
讓政大和暨陽有義塚勢家溺堪輿言欲盡奪之可珍  
焚香誓天具文申請詞旨激烈大吏直其事勒碑永禁  
侵奪鄉人名其地曰毛公地俗溺女嚴連坐法存活者  
以千萬計貧民以男女為質踰期沒為奴婢可珍計其  
備直還諸父母調靜海時蘆田久為豪家私庄歲耗課  
額不數月宿弊頓清晚年高蹈不出屬績前一日援筆  
自作行狀授門人卒年八十有八康熙十二年知縣申  
良翰申請上臺題准崇祀鄉賢  
曹士選號太連龍眼都人善屬文試輒高等萬曆己亥  
選貢第一廷試第二初授浙江杭州府通判時藩王子  
弟恣橫虐民吏不能制士選奮不顧身為民請命藩下

香山縣志

卷之七

十二

稍稍歛戢民賴以安太吏以是重之委署府篆兼攝四  
縣士選益勵清操勤於庶政案無滯牘獄無冤民尋復  
丁內艱去之日囊橐蕭然士民遮道涕泣為建祠立碑  
何吾驕字龍友號象岡少時嘗當席試無絃琴賦一座  
嘆賞萬曆丙午舉於鄉公車途次上父詩婉孌眎惻已  
未成進士痛父不逮祿養愀然不樂廷試初擬鼎甲神  
宗手書改二甲四名授翰林院庶吉士館課常第一內  
閣語同館曰若等文行皆當以何生為法性嚴介時神  
廟端拱四十年人情玩愒士大夫捨廉隅尚圓通吾驕  
以名教為己任天啓元年秋散館授編脩領覃恩勅命  
奉冊益藩謝絕餽遺禮成便道覲母會逆閣用事憂憤  
太息曰禍將作矣吾其終身奉吾母乎未幾嫡母劉生  
母羅相繼去世廬墓六載丁卯服闋時璫禍正烈吾驕  
告於家廟曰兒主臣義不容已年來皇甫威明之耻懷

之久矣嘗恐貽親憂今不於親存日見膺滂事是天之厚吾親也從此名義所關倘僅遭削奪當單騎歸奉墓田耳秋入都未旬日而熹廟升遐烈皇帝從信邸入承大統一切登極詔誥冊文謚議政府咸以屬吾騶是時逆璫雖已就戮而黨類猶列班行遂詣政府曰今日大事在褒忠起廢而已誠宜速舉行副中外望其頌璫建祠搏擊善類諸奸宜分別輕重以彰維新之化至于君子小人之分宜於激揚中默寓變化之術從此磨礪砥礪天下人心當漸歸正耳旋得詔毀天下逆祠分別黨罪重輕其以門戶削籍者次第登用尋晉中允再晉諭德掌右春坊事知制誥纂脩神廟光廟實錄崇禎元年春晉左庶子掌左春坊事分較禮闈秋克經筵日講官書義之外多引古證今反覆推明歸之人主二年正月進講生財大道一節上嘉悅諭內閣曰這講切裨時政

作何稟發各部覆行閣臣奏御前講章無稟發之例講內有合聖慮者容臣擬諭該部具覆上領之因取章內所陳屯田班軍冗濫員役及賦役全書諸事分屬部覆仍粘所講於文華殿屏二月又進講畜馬乘二節至無如之何之句吾騶正色起奏曰天下無不可為之事聖人無不可為之時所以說無如之何者蓋小人之為國家亦自有聰明疆察之才似是而非之議人主不覺聽任至於專久紀綱日壞人心日離雖悔無及此邪正之幾不可不辨之蚤也然使人主當此無如何之時誠能悚然警懼猛然改圖亦自有撥亂為治之理臣常讀易當豐之時爻彖凜凜致戒而時當蠱壞正菑害竝至之日文王繫詞則曰元亨曰先甲三日後甲三日天下事皆更新苟丁寧宜無不可為者上復俯詢既已蠱矣如何復得元亨對曰蠱是紀綱廢墜政事流失此時天心

厭亂人心望治忽然天挺聖人紀綱政事人情天命立見轉移所以繫曰元亨又詢何謂先甲後甲對曰祖宗成憲原自無弊到蠱時為小人變亂此時要從新脩飭所以文王下更新字又要君臣汲汲皇皇始終振作然後可以傾否開泰所以又下丁寧字上嘉嘆久之會纂脩神廟實錄成晉少詹事兼侍講學士鵠恩廕誥命三年春扈從臨雍以師臣禮坐論賜茶轉正詹侍讀學士四年冬光廟實錄成賜白金文綺五年晉禮部右侍郎協理詹事府事仍克經筵日講官與烏程溫體仁齟齬疏請求歸不報六年會推閣員廷臣咸首舉吾騶晉禮部尚書兼東閣大學士入閣辦事三疏懇辭始拜命既相開誠布公持大體每奉暖閣召對凡會計典禮邊防河漕水旱盜賊諸事言極剴切尤毅然進賢退不肖時陳宗伯子壯姚宮詹希孟張庶嘗溥皆為烏程所嫉吾

香山縣志

卷之七

十四

騶力為調護言宮如范淑泰章正宸凌義渠姜思睿吳履中或慙直忤旨或持正中媚嫉又悉力匡扶於是建白者得以盡言而忌者益兢兢矣七年以登萊捷功加宮保又以羽林河內捷晉殿學廕子皆具疏辭時中使監督諸路所在驛騷具揭請并撤督餉者火災起戚畹家歸咎道上蓆舍奉旨撤去吾騶具揭爭曰戚畹不慎窮民何辜若撤此將使數萬人宵啼露處於輦轂下矣遂得免撤是年內閣考滿晉殿學廕子入監讀書領三代誥命上手勅褒美時召對命廷臣各舉堪任冢宰者少宰舉欽定魏黨呂純如吾騶不可曰故事會推大僚有不合者科道專司叅駁今可湧然宰相舉乎臺省遂交章論劾卒寢之先是都諫許譽卿疏下溫擬旨譽卿把持行私着革職吾騶曰太宰疏論言官未有顯跡應令自行回話或發廷臣會勘遠擬革職非朝廷優養言

路意也大忤溫意文震孟太息曰言官抗論得罪權要自昔為榮許都諫即褫籍去庸何傷溫色變袖太宰疏是夕宿直房草密揭劾震孟及吾騶吾騶立草疏乞骸奉旨准致仕去震孟亦同日去倪司成元璐追別郊外贈詩云如何鼎耳雉飛鳴占白台司怪事生累日精思堂偃月一時坐失手調羹已知渭水分涇水豈必蠻兵報觸兵天上風雷等閒事讀詩誰不讀東征從前夢卜與人情未若新篇又送行難得青蠅為杜宇原無梟鳥變倉鷓蘇公暴公各盟詛雷戶匡戶如踐更聞道橫琴山色好繇他王氣屬秦城都人士咨嗟傳誦達于禁藥云既歸家居講學以匡正風俗為事四方學者過從日衆遂葺翁陔園創異撰堂愚公樓以處之為香邑請廣弟子員額至今賴之丙寅歲荒捐資貴糴賤售存活甚衆濠鏡澳彞誘亡命掠市子女吾騶為制府條上方略

香山縣志

卷之七

十五

邑賴安堵壬午癸未間連歲旱盜且四起先是設賑諸衛所屯田以荒陷告者貽當事書分別停徵軍丁賴以安集甲申變作北望哀號直經入省郡行哭臨禮後聞留都定策旋返山中賦十五聲哭詞秋悲八章見志憂悲成疾卒時年七十有一所著有元氣堂詩文集三十卷經筵日講拜稽錄四卷周易補註四卷雲笈軒稿二卷石刻楷草四種藏於家

李蓀宸字伯襄小欖人萬曆壬子鄉試第二癸丑成進士授翰林院庶吉士乙卯予告還里營先人葬間登羅浮西樵諸山與樵牧狎處遊屐所至賦詠成帙庚申秋入京直起居注旋掌內書堂不欲與中涓作緣求改掌誥勅文辭莊嚴有體壬戌較禮闈得人稱盛先是神廟光廟相繼升遐班聯中門戶角立孫宸冊封藩府事竣歸里超然評論之外尋晉掌春坊左庶子奉纂脩之命

乙丑春赴京途次晉南京國子祭酒除納班准撥之例  
素封不得輸資買間丙寅春晉詹事府侍讀學士教習  
庶吉士以節義相砥礪晉南禮部右侍郎攝禮戶兩尚  
書事中官矯旨命禮部監逆閣祠額孫宸竟寢不行崇  
禎初晉禮部左侍郎掌翰林院祭典晉經筵克日講寓  
箴規於剖析昭合時政上霽顏聽受有行學俱優之褒  
庚午回部頒程式以挽浮靡禁異服以還樸茂申教科  
場苛摘考官得量議辛未知貢舉進士井濟文謨犯光  
廟諱及禮部主事馮起綸回奏魏光緒參鄧之沛事俱  
下部從重議處孫宸代為引罪極力申救得輕擬時論  
多之五月亢暘詔上書陳言孫宸具疏有曰母以意在  
振弛而間加重典母以言者過當而遂動嚴呵隱刺時  
政意倍婉切奉旨切責回話卒蒙鑒宥十月詔諸臣面  
陳時政孫宸備陳陰陽消長大小往來國家治亂而外

香山縣志

卷之七

十六

吏貪污繇撫按情面廷臣廢弛因宦官干政反覆剗切  
晉南禮部尚書上地震疏再申前疏所未悉舊制有寺  
田五百頃供陵寢香火為豪強所據孫宸清覈復舊額  
南國子生每大比例待北部發咨應試癸酉科以他事  
通行察覆北咨未發孫宸疏請暫據南咨起送國子生  
乃得與試甲戌秋三疏乞骸俱奉旨慰留孫宸還山念  
切因賦金陵歸思百韻詳在家乘中年五十有五卒於  
官囊篋蕭然惟古爐香帶各一鬻克斂殯其餘圖書字  
畫敝衣數襲而已詩祖三百篇字祖晉魏草篆隸楷皆  
工著有建霞樓等集行世  
何藻字采侯小攬人萬曆壬子舉於鄉公車報罷道出  
齊魯謁闕里登泰山縱觀七十二家之遺發諸歌詠以  
見其性情以母病不肯赴春官試辛酉冬母曰汝第行  
也天下事病者未必死而死者未必病也此行倘博一



第邀朝廷祿養便可畢我一生矣乃治裝然度嶺未幾  
托疾返甲子丁母憂哀毀骨立幾不能起三年中未嘗  
與家人歡接一語有終焉之志戊辰族人勸勉入都得  
潮之普寧學博甲戌陞國學博尋轉戶部主事督理山  
東臨清倉務倉向用舊斛年久就壞補治漸失舊制藻  
念民困已極為請更新斛以便民時中使督催山東四  
省糧餉按臨清藻抗禮不少遜中使郟之飛章劾藻匿  
新斛用舊斛就逮詔獄藻處之怡然曰禮感君路馬芻  
者有誅况中使乎臣知臣罪矣及中使以賄敗得脫詔  
復原職官至戶部廣東司郎中卒年七十有三著有普  
寧宦稿三卷西塘棠刻二十卷螽斯集二卷四六新抄  
五卷清暑紀言二卷

蕭來鳳字啓韶萬曆乙卯舉於鄉性狷介不苟取鄉薦  
十餘年惟置田二十畝初授龍川學博再補合浦學博

香山縣志

卷之七

十七

遷知廣西河池州事州故僻簡來鳳因俗為治吏民安  
之以循良奏最遷南寧府同知有廉惠聲嘗署邊州事  
多所興革地近交趾有官兵鄉勇各五千悉統於州官  
來鳳以書生將萬人嚴賞罰勤訓練無敢譴譁失伍離  
次以嬉者及得代所過鄉落携老扶幼稚牛酒候送于  
道

伍瑞隆字國開大欖人領辛酉鄉薦解額丁丑中會科  
副榜授化州教諭修高州郡志以信史稱擢翰林院待  
詔遷戶部主事再遷員外郎管倉場歷河南兵巡道謝  
病歸以樗櫟自况所居名零樂林村蓋取義樗櫟也著  
有臨雲集辟塵集金門草白榆草石龍草零樂林草賦  
草工字畫世寶之

盧兆龍字本潛小欖人天啓辛酉壬戌聯捷進士筮仕  
清江縣性嚴毅廉介課農桑輕徭役免罪贖犯者赴官

道旁植柳一株有鞠土神殺淫僧諸案遠近神之政暇  
則集諸生譚說理要行取工科給事中甲戌會試分考  
晉吏科都給事中京察掌計典抗論權要直聲震朝野  
時大家宰缺少宰張捷疏舉呂純如兆龍率六科交章  
論呂嘗黨魏害正上手定瑞案墨瀋未乾而臣子自違  
背之何以示天下後世并劾捷妄舉事遂寢前後掌垣  
八年多所建白烈皇帝特賜黃金<sub>百金</sub>扇一御書剛大精  
神直方氣骨以寵異之冊封益桂兩藩著有桐封集遊  
五岳集

梁國棟字景升黃梁都人天啓壬戌恩選甲子舉於鄉  
授江西彭澤令彭澤俗刁民罷禱廉以持已敏以御物  
民懷其惠姦畏其威咸稱為鐵面梁公甲申闖賊之變  
附逆者蜂起國棟擒獲偽官三偽印二左帥兵所經州  
縣無不殘掠及過彭澤誠曰此梁侯境土也慎毋擾以

香山縣志

卷之七

母老求歸去官日彭澤士民哭留遮道家居十二載讀  
書自樂年七十有一

鄭一岳字東巖與兄一龍同補邑廩餼而一岳名尤籍  
甚丁卯舉於鄉丁丑成進士知鎮江丹徒縣縣當大江  
之衝南北郵傳往來迎送無虛晷且卯辰之間徵兵調  
賦蹄織羽飛令其邑者往往以奔走簡書形疲神瘁而  
拊循保障無論已一岳才足四應一切造請徵發吐嗟  
而辨未嘗煩苦其民常預支借庫貯遠糴糧米以備漕  
兌緩急而後緩征補庫藏由是課額屢登歲蝗旱民多  
流亡一岳建廠賑粥存活以萬計少暇即課文造士捐  
俸置田二百畝供多士膏火士為立香山書院時邑紳  
萬編語太守曰歲饑穀貴由於酒戶盍禁之守然其說  
酒戶鼓譟破萬家守不能禁一岳立遣人擒治其首亂  
者遂帖然會山賊抵境舉城洶洶太守曰令行矣乃殺

然跨馬率家丁百十人夜往轉戰擒其渠魁羣賊散去  
邑賴以安任滿行取旨下謂行取知縣練達可暫補殘  
破縣去數月當另召一岳得山東單縣是時齊魯荒殘  
尤甚單又僻邑豪右橫肆鄉里有忤其意者率置獄中  
不由令而獄卒又穴地埋人至半截立死一岳廉得其  
寃民狀立斃獄卒於杖下邑大稱快無何以母周氏八  
十垂病陳情會甲申變起孤城疲邑事不可為一岳愴  
然就道至南康舟次病忽發不藥以死  
國朝梁雲扶字圓嶠小欖人為諸生以文章著名制業  
之暇旁及詩歌崇禎己卯舉於鄉  
國朝順治壬辰成進士授山東高密縣知縣甫之任鄰  
境鎮將叛雲扶守禦有方民賴以安甲午分闈較士所  
識拔率名下士今多為顯官在治卓有政聲奉  
旨欽取授吏部驗封司主事卒於官所著有詩文等集

名賢列傳

宋陳天覺庫涌人紹興八年戊午試博學宏詞科議論直切為時貴所黜不仕先是香山止設寨官一員二十二年天覺建言香山寨宜改陞為縣便民東莞令姚孝資以其言請於朝乃割四縣瀕海地為香山縣劉中行良字園人任瓊州監押引諭生黎五百餘人歸歎于宋初授秉義郎再授從義郎邕州左右江提舉後致政歸舍宅地為無量寺而終老于恭常都南大涌今子孫尚存

元阮泳延福里人至元初領鄉薦為邑學教諭遷惠州路學教授學博行修一時視為儀表攻古文辭以韓歐為宗子士桂亦領鄉薦以文行名

趙若舉黃梁都人本宋宗室端宗景炎元年王師航海若舉赴難授武翼大夫帶行在閣門宣贊舍人召募潮

香山縣志

卷之七

二十

居里民數百以勤王擢廣南東路兵馬鈐轄宋亡元張宏範遣兵欲屠潮居若舉力以一鄉民命為請于是潮居里三百餘家賴以安

趙梅南黃梁都人本宋宗室承節郎時鏃之孫邑令懌夫之裔善書翰浮游物外好品藻詩文嘗作潮居八景詩同邑楊士元序之評以為因事陳詞氣嚴理正士元遂廢和梅南往復辯論必求工而後已與士元書畧曰潮居山窮水盡之鄉刀耕火種之俗周王之所馬跡不到謝公屐齒之所不及蓋遐裔也僕生長於斯每風日晴明山川輝媚未嘗不登高望遠遊目之際偶與意會不書所見使其物跡湮淪是林慚澗忽耳因成八景詩以寄情志勝不擬先生首闡一序并詩品題諸公和章疊賜至九十六首承執事轉付默齋先生仰塵匠石運斤成風斷鼻端之壘斷者誠難受斷者亦不易昨蒙發

至改本披味再四剪蕪截繁撮機取要浩乎吞鵠夷九  
湖于胷中而無西子之累然其中微有一二不無疑焉  
所謂詩無定鵠會心是的信矣謹錄別楮呈似乞為詳  
正自號意翁構亭唵嘯其中寓意佳山勝水隨在而樂  
頗尚空寂不仕終竹徑構亭曰倚棊門聯云但存方寸  
有餘地不可一日無此君

明周尚文仁厚坊人初遊邑庠以穎俊選入郡學時翰  
林侍制黃哲解官家食尚文從遊讀書番山清該博  
哲重之洪武甲子領解額第一乙丑登進士筮仕承龍  
巖坐事不終然詩文皆超悟有法一時才子也  
林茂小黃圃人鄉里素不知學茂篤嗜不為俗移文名  
大著移入郡學洪武庚午領鄉薦入監列上等擢為湖  
廣道御史陞刑部員外郎  
歐觀生仁厚坊人倜儻不羈博學工文詩尤豪邁洪武

香山縣志

卷之七

二十一

丙子鄉貢進士教授紹興以性傲忤當道左遷典史歸  
容悌與字行白烏石人性醇厚學博行脩明經長于書  
永樂中署儒學事聘脩邑志士大夫咸推重之執弟子  
禮者無遠邇居家有禮男女各有學祀先謹祠堂之制  
嫁宗族孤女數人母陳氏病風癱悌與躬侍湯藥十三  
年無頃刻懈及母歿哀毀踰禮邑人稱為孝行先生自  
經學外攻吟咏別號雲嵐所著有雲嵐集數卷卒年七  
十有七

徐觀字瀾若麻洲人生而有神童之目九齡補邑弟子  
員景炎庚午舉於鄉甲戌成進士時方弱冠廷對後請  
假完婚歷仕至南京刑部尚書郎性曠達不樂圭組遂  
棄官歸築室太石之陽賦詩見志詩文不事雕飾著有  
臨流集

鄭宗維烏石人宣德中領鄉薦為太平教授性醇厚善

為文嘗典雲南文衡藩臬推重治家甚嚴諸子各能通經以文學名子慈登科知臨武縣三年以內艱歸囊橐如洗民誦其廉

鄭鴻字振儀蓮塘人年十五有聲庠序間成化甲午鄉試第三名屢困公車及梁文康為少宰客曰少宰君姻友也何不於此時求與清華之選而故僕僕道路為鴻正色應之曰過之得失鑿之好惡出焉進之陂正己之榮辱繫焉子徒知少宰之能貴人而不知人之有以自貴之也遂絕意仕進卜築蓮峯下鑿池構亭徜徉自樂考終於家

黃經字子常麻洲人生而嚴重律身有禮尤嗜學自少至老手不釋卷終日端坐諷誦未嘗少懈乃築稽古堂于東林山下自號山海子讀書談道邑多從遊者累試于鄉不第貢入南雍弘治乙卯應天府鄉試學士楊守

香山縣志

卷之七

二十二

趾得其文嘆賞寘之上第由是有名辛酉以親老願就遠方任雲南霑益州同知正德戊辰丁外艱及服闋詣銓部請就教職得改直隸泗州學正益肆力於經籍時御史詣學掣籤講書教官率跪奉籤經曰此何禮也卽致仕去著有香山志及滇陽第一州志淮泗一覽小學節條諸書詩文共千餘首藏于家

黃畿字宗大瑜之子七歲善屬對鼓琴見者呼為奇童十六歲補郡庠生通詩春秋二經撫茹百家然竟不能取合有司一夕同舍生攘鷄邀之謝不往卽束書歸曰是固嘗業舉擅場者其行若此吾胡可與侶哉乃告改邑庠卽以養親歸自是絕意進取隱居粵山之麓乃研九流通三才五行之蘊撰三五玄書始猶雜于釋老既而讀邵子皇極經世深造其奧嘆曰自箕子以來合術于道其惟堯天乎遂訂律曆作皇極管窺十三篇晚年

潛心大易中庸曰中庸易之疏義也大極通書定性西  
銘猶中庸也乃述易說若干篇其論學則曰前之三代  
由夏歷殷而文于周後之三代由漢歷唐而文于宋名  
理醇粹周宋其齊軌乎周至玄矣道同乎宓義程至大  
矣見卓于顏淵朱至博矣功亞乎仲尼再闢渾淪不亦  
玄乎心普萬物不亦大乎功在六籍不亦博乎又曰孔  
門傳心之要一言而已慎獨是也平生未嘗袒露星月  
下夢寐中有不善語必顛天謝過居暗室臨妻孥無有  
惰色性至孝先意承志惟恐不及父母有怒長跪叩頭  
俟釋乃起一味之甘必獻廟奉親而後敢嘗居喪哀毀  
逾禮既葬日猶哭諸墓方晨有虎突至前俯伏而去旁  
有山人廖翼見之大駭為作孝子感虎歌以美之田宅  
財帛兄弟欲之即與一無所靳捐已田七十畝有奇為  
義田以贍族鄉鄰或肆凌轢人所不堪退縮不與校卒

香山縣志

卷之七

二十三

年四十有九別號粵洲學者稱為粵洲先生嘉靖甲午  
父老覈其行實上之當道揭名于孝友坊丙申家人以  
其著述送察院御史周煦嘆曰此真隱居求志之儒也  
建逸士坊以旌之

楊應魁字啓文髫年善屬文三試皆第一嘉靖甲子舉  
於鄉計偕報罷讀書西湖踰年歸畫出其篋中舊稿熱  
之曰是不可公之同好也乃沉酣史漢而以韓蘇為體  
戊辰已冠本房副主考抑之嘆曰是有命焉非戰之有  
利鈍也歸家下帷益力遘疾卒

何世睿字信斯父庠生純母鍾氏世睿姓五月而純先  
逝生甫數歲而鍾又逝王母陳顧復之會族人構難王  
母襁褓就理郡城比五六歲夜燈熒熒終夕不寐侍王  
母側口授書義輒自句讀又預商詰朝法庭作何告語  
輒能出己意為應對詞王母憂悴中拊而泣曰孫他日

成長作何令圖今日為汝瀕死者屢矣世睿泣跪曰孫讀書勵行圖顯揚以為報詎敢負祖母教年十三著聲學宮深研性命之學以敬為本以靜為用根極理要而器量復汪汪千頃方構難時或告貸百數十金不償怡然不問也一日道遇悍男子揮刃執之曰盍解衣與我世睿微笑舉似曰惟君命其人奮割一袂以去返顧曰不爾吾將砍汝矣語畢以刀自殲死乃知其人為仇所陷忿無復之欲挾鮮衣者偕死而世睿從容遇之獲免于厄嘗語人曰洒掃應對雖是穉迹而感應之理即在其中須就穉迹上見得心性方不枉穿衣喫飯又曰我輩肯以廉恥二字共相勸勉念念顧惜則三代之風可復睹于今日若蕩檢踰閑以示高放江河日下吾不知所救矣嘉靖甲子子述忠述瓚同登賢書祀家廟因出夙昔家難構訟一篋告祖焚之曰願吾宗咸昌大永永

香山縣志

卷之七

二十四

無孤危致相戕虐願吾子孫體吾志砥礪自修毋記怨者名自是子孫敦睦鄉黨老無以為養死無以為殯幼無以為字士力學無以供修脯農力耕無以供糲糶緩急咸資焉年五十三貢于鄉而卒以仲子鉉之子大學士吾騶貴誥贈如其官

梁夢雷字震宇小欖人邑廩生學識超邁先世以五經分授諸子人治一經夢雷授禮記獨能貫通諸經為文根極理奧一時學者咸取法焉萬曆間謁選得肇慶府司訓集國家典故如星曆禮樂兵刑錢穀使諸生分習之曰母視為迂遠不急也士冠進賢然後搜索此晚矣暇則支筇循行定山石室之勝當其會心處一羶危坐神姿高徹栩栩若僊也鄉黨中與何述賢稱莫逆一日握鉉手曰而家三郎異日事業殆不可量非予女不可配因締姻焉三郎郎相君吾騶也其後梁夫人歸相君



令德雅度為女宗師嘗以一品命婦朝賀烈廟周皇后於武英殿賀熹廟懿安張皇后於隆道閣一再詔女官問夫人安賜宴歸第夢雷益自其少時而預知之矣生三子長中朗舉萬曆甲午科歷任刑部雲南司郎中誥贈夢雷如其官次中英中醒俱邑庠知名曹啓益字文泉從父宦吳門比歸學日進而書法日有名補邑弟子員益耽古學宵火晨鷄寒暑不輟由選貢歷官至知州所至有政聲其宦蹟詳麻哈州志解組後構亭北郊日與客觴詠其中客去掩扉臨池池水為黑四方以縑素求字畫者殆無虛日毫而好學詩賦古文詞晚益工

何述鉉字調元小櫬人同兄述忠弟述璣皆負才名有香山三何之目兄弟聯翩舉孝廉述賢獨困諸生著四書說者再讀易緒論者三性至孝父喪哀愴幾絕三年

足不逾戶限自是遂無進取意縣令嘗因述鉉兄弟欲識之數年終不可得且遷任去謂其兄弟曰不意金昆逃虛乃爾讀書五羊有醉而遺金者越半載始得其人還之葬其先遺櫬之未舉者五世初艱嗣垂暮舉三丈夫子其中子則相君吾驕也教諸子於相君尤嚴朴責幾不可忍家人曰兒慧甚奈何苦之曰彼有過人之資不多方裁抑懼無以為他日棟樑用耳又嘗曰教子必學為聖賢科第末事何敢以功名焚灼後生心乎其後相君卒為名臣

何述璣字贊元束髮受書便問聖賢何如人人皆可為之否弱冠魁甲子鄉闈於經史諸子性理語錄日手書數十則以己意論述之過格言要論矢志躬行工於詩尤善書法著有周易問介景堂文集崇禎間祀鄉賢郭紹瀛字瀛川髫年遊邑庠有文名嘉靖辛酉舉於鄉

丁丑會副任岑溪縣學教諭轉國學歷兵部司務所得俸置屋為宗祠復捐已田之半為祭田子尚敬萬曆戊子鄉舉任海陽教諭造士有方陞知沙縣後丁母憂家居捐資倡復蓮峰舊學址纂輯尚書約註學者宗之康熙十一年士民公舉宜崇祀候詳

何吾麟字瑞虞邑廩生縣令遣其子受業於仁山書院未嘗干以私前後科歲諸試首列者十七次中副榜者三卒不售益淬勵窮理格物究明人心道心之辨不以得失介介也以子適道贈文林郎工部主事

繆士傑號賓吾龍眼都人萬曆四十三年選貢初任河南河內縣主簿陞潁川府衛經歷以清廉敬慎著名四十八年乞歸閉門訓子族有貧而鬻子者代贖之歲饑減價糶穀作粥以食餓者舉鄉飲正寗九次年八十三子九人俱有聲邑庠第七子志文字子岸順治八年授

香山縣志

卷之七

二十六

番禺縣儒學訓導獎掖秀傑優恤寒儉造士有方得蘇湖遺意巡道史燧旌曰首郡儒宗子時對為諸生克紹其家學云

繆子和字子介龍眼都人弱歲能文力追先正縣府道供第一食隸文名益盛縣尹重其才數延請不至曰吾愛吾邑耳事父母以孝聞樂施予器量尤不可及隣人梁姓家貧時周其困乏梁酗酒以瓦暴擊志和禱于頭血仆地志和不校梁死仍召其兄之子主其喪施棺殮具人稱為長者年荒嬰孩載道收養之死而無告者具葬埋之其事母也饗飧同席晨昏問寢興有疾必強顏整衣而坐絕呻吟聲恐貽母氏憂也母微疴即旁皇無措顛天願以身代

國朝順治辛卯應歲貢奉 詔准恩貢同年得美官或勸駕志和曰朝廷鍾鼎雖榮弗易我膝下菽水承顏之

樂也年七十孺慕彌篤常為母浣濯裹衣人擬之老萊  
子母黎氏一百有三歲見者壽

香山縣志

卷之七

二十七

孝子列傳

宋阮與子赤坎人天性純篤讀書能通大義早喪母事父元輔盡孝德祐丙子父病劇與子旦夕稽顙北長請以身代迺剝股肉和藥以進父瘳鄉里以其事達于有司經畧使徐直諒賚以二帛號所居為孝行坊

療病與此微不同

郡志云顯天恩請開賜割肝以

邑人黃佐曰嗚呼父母全而生之子全而歸之禮也故刺股割肝法制所禁此韓愈氏所以有鄆人對與雖然世降俗薄固有悖逆其父母者矣以與子之事觀之寧少知愧哉故論者當原其一念愛親之誠可也

明容師偃字德治悌與四世孫父春泉罹癱疾兄弟六人惟師偃侍朝夕弗離側正德丁丑寇掠其鄉人奔竄師偃負父而逃賊追之急父麾使遁師偃不肯去泣曰

香山縣志

卷之七

二十八

父子更相為命去將安之寇至俱被執縱火焚其父師偃泣曰父老且病請以身代寇舍其父遂就焚死時年二十一父哀之設祠置田祀之

又函千秋馬石岡頭月還照當年孝子心

士天各賦說詩有曰淚看諸輓極傷情子不亡身父不生賊火縱說千丈燭也知千古不燒名

黃廷珍字席之銓之子賦性剛直涉獵書史精於醫事繼母孝處兄弟友父沒廬墓三年卒年六十三容章美字中含長洲村人邑庠生幼喪母事父及繼母以孝聞繼母生弟友愛彌篤順治戊子海賊入村章美以父病足負父走為賊所得賊欲質其父遣章美歸鬻產來贖章美曰父老矣不堪久困舟中願以身繫使父歸賊從之父歸鬻產得金時章美弟二少子為他賊所得父先往贖賊聞之怒縛美梃檣上煅煉備至美無怨言會官兵至賊取被擄者悉投海中舟輕乃去章美遂遇害鄉人自賊逃歸述其縛梃上時猶念親不置有詩

曰東洲落日洪流緊一望親闈何所之聞者莫不掩涕  
涇陽申維翰曰孝者人子所當盡之事孝子者人子  
不敢居之名安常處順竭力承顏總是本分以內必  
也倅遇禍患不有其身以全其親乃可云孝志中有  
明二百七十餘年惟容氏世濟其美豈孝德固出於  
一門抑所遭之不淑後先一轍亡其身不敢有孝名  
而名斯歸之舊志載宋阮與子刲股事此與鄭娟娘  
之未嫁守貞皆不得為節孝之正肢體髮膚不敢毀  
傷女子未嫁身非自主倫常之間獨見奇節要以激  
挽頽俗有餘矣

高士列傳

明黃仲翁字壽昌龍眼都人儀表凝峻悖尚行檢見子姪必冠服長于詩遊太學歸不仕所居環植花木自號翠軒闢稽古堂聚書克初曰吾子孫必有嗜之者鄭子綱字秉常雍陌人治經能文隱居教授立家規以善鄉俗率鄉民共遵元尹左祥諭俗三編凡鄉人詩章有及于奉先事親言孝敬者採而刻之題曰孝弟詩自序其端以為訓

楊餘蔭字樸庵其先廣陵人生七歲而孤及長博涉經史尤通春秋大義歲辛酉邑大饑餘蔭捐賑穀三千石先是元至正間歲饑餘蔭五世祖紹孫與其弟賑穀五千石邑人德之為建麗澤亭至是新之題曰繼美焉劉君采字而先仁和里人也博極羣書絕意通籍稱高隱著三才要覽續輟耕錄一卷雪溪詩一卷晚號沛泉

香山縣志

卷之七

三十

逸叟榜所居曰樂道年九十三讀書挾策而逝高翀字羽叔有田百畝鬻五十畝為其父立祠又割四十畝公之兄弟以為祀田僅留十畝自贍力學教授至老不倦所著有江臯漫錄存愧錄讀書摘要喪葬記竒陽漫稿等書居家鷄鳴即起率孫子正衣冠焚香拜家廟隨率讀書曉坐祠門省閱宗族子弟讀書者農工出作者皆隨事訓誡朔望講鄉約越日課文藝一時風俗為之淳美縣令造廬禮訪有修姓與薛姓爭沙坦三十餘頃薛求翀言之縣令願與之均翀曰吾年逾六十屈節以求所不屑也使子孫不肖何用使子孫肖又何用乎修薛聞之感其誼亦不復爭年九十四毛濬字孟深邑庠生性純孝五歲母歿父元鈺病足濬視寢膳不出戶者數載年十五父歿事繼母以孝聞弟宜聲為賊所害濬以計得賊及贓告縣捕斬之繼母遺

腹生弟天濬濟撫育教誨之尤篤親故嘗與里人黃六亨善六亨被寇擄不能贖濟以菓園質富人數十金卒贖六亨於盜生平博極羣書試輒冠軍所著古文詩歌有敬義堂集十卷尤工書法子三人新周大周定周皆有聲士林定周丁酉舉於鄉

梁思誠字用孚黃梁都乾霧村人萬曆時寇犯境兄用欽遇難思誠懼傷父母心乃棄舉子業專意侍養自謂所居可隱因號居隱父母歿獨力營喪葬事不以累其兄子出三百金產為嘗田與兄子同收供祭祀撫兄子如己子尤仗義好施獎人之善折人之過鄉人無不悅服天啓間舉鄉飲賓給授冠帶長子應秋遊邑庠力學著四書講意五卷順治戊子社賊起以梁氏世德素行相戒勿入其門

梁源泗黃梁都乾霧村人邑庠生生而有至性甘恬退

居家力行所學父國棟嘗為彭澤令有聲源泗善事父母晨昏子職惟謹母病籲天願以身代及亡水漿不入口者旬日服未闋父又亡哀毀逾於曩時晝夜號泣遂至失明生平處己以信接物以謙課子弟以書皆著聲庠序食廩餼為善承其家學云

鍾士傑字瑞岳邑庠生生四歲喪母善事繼母庶母父歿異母弟長者六歲少者纔六月士傑誦讀之暇專任家督析遺產代兩弟綜理之凡出入必具數隨子粒多寡無隱弟婚娶悉還之會有家難身當之不以累兩弟在庠四十五年屢困棘闈學使者徃徃嘉其德行數見優禮年七十傳厥家務遺誡其子曰我出世時幾陷我母於產難長而德不加修生五男僅得一生十一女僅得五生平苦應接太繁無長物諸女不能奩撥亦不能隨俗送租盡吾心與往來而已我處幼弟繩之以禮

諭之以道篤之以恩遇患難無規避親愛之而已承上  
接下不敢萌一欺心亦不敢輕慢一人恭敬之而已處  
姊妹每助不給焉心體之而已處同儕言不敢先行不  
敢過退讓之而已處戚屬寧捐已財不傷人有怨以行  
之而已此雖吾之天性乎亦由祖宗忠厚傳家故拳拳  
奉持耳以若所為猶懼不免人指摘况其不如者乎爾  
於烝嘗田園恪守舊規聽兩叔依序輪收春秋祭祀寧  
厚母薄必盡其誠我與爾叔一體所分知有恩不知有  
利父猶天也親叔猶父也爾以父事叔而叔有不以子  
視爾者乎噫尤有望焉效祖父早完糧莫煩官司追比  
效祖父肯安貧莫使登門索債惜祖父苦儉之積莫賭  
博傾家體先人付托之重莫酒色喪命爾不思我出世  
之苦懈怠自安視祖父艱難之業若弁髦然我肯瞑目  
於地下否嗚呼觀其所言可以想見其人矣

香山縣志

卷之七

三十二

陳光龍四字都茶園人邑庠生性慷慨好義順治戊子  
歲饑出穀賑濟康熙戊申海寇犯村殺人施棺以瘞死  
者仍捐已地築圍牆防守村賴以安  
盧間生北山村人邑庠生嘗捐地立村名曰雙龍構講  
堂課子弟正業之暇旁及詩歌一時從遊者多著聲庠  
序



義勇列傳

宋劉必從始家仁山下性勇果有材以功授教武校尉邕州副將贈封其父中孚為忠訓大夫兄必恭訓武校尉紹興壬申初建縣治必從捐其祖居徙家長洲邑人義之

元楊仲玉南門人泰定甲子海寇黎靜海嘯聚為亂宣慰使邛雲谷中奉親師海道仲玉修刺謁之大喜令率義勇五百人以從遂破賊鄭榮叟蓮塘人仗義有為元末巨寇相繼剽掠縣治宣差達魯花赤朶羅歹力不能支乃率榮叟及邑人楊昆等移縣于古寨山上屯守已而朶羅歹卒人心動搖有族人曰橘官溺死里人相傳為神謂之先鋒太保榮叟迎而禱之每寇至即言見一人衣紅巡行陣中鄉民奮勇先登寇輒逝去與衆築壘鑿塹據守一十八年龍潭

香山縣志

卷之七

三十三

賊盧寶善等累攻不下洪武初征南將軍廖永忠率兵至乃歸附云

明李英妙大攬都人家饒于財讀書通大義正統己巳黃蕭養作亂族兄有服農者竊往從之拜偽千戶率其黨數十人至家執英妙謂曰前日吾兩足皆塗泥今拜官矣弟盍從我耶英妙大罵曰汝盜也尚可言兄弟耶恨不斬汝萬段賊怒遂殺之鄉民聞變皆被脅從越月賊去子智女觀娘收其尸面猶如生

梁富字東橋黃梁都人正統十四年賊黃蕭養反鄉人林帝佑附之遠近煽動富激烈指陳大義民無逆志賊怒協富降不屈復大罵賊賊殺富投崖門海中

王言香山所昭信校尉萬曆十年五月倭寇犯鷄拍村言奮志前驅生擒倭寇嘍咤等二十餘名斬馘無算督撫優賞言悉以所賞散之士卒三十八年隨征廣西

多所斬獲後以扶病出師死於戎壘  
張金元黃旗都人由南頭寨把總歷任至廣海守備逆  
賊名黑骨腸船數百沿海流劫金元帥師力戰屢捷後  
竟以陣亡

陳禧仁厚坊人以身請為吏性剛果有為仕夔州府梁  
山縣典史正德己巳藍賊寇蜀詔起都御史林俊秉鉞  
討之禧督兵前驅奮勇先登大挫賊鋒于華隴賊遯乘  
勝追之塢其巢穴而還中途遇餘黨力戰而死俊痛惜  
其忠勇為文遣教官祭之事在四川總志中

國朝何兆寧字仲軾邑庠生大欖都小欖人沉深有大量  
嘗省相君季父於京師習聞天下大計益究心韜鈴之  
畧會上命禁旅討賊河內兆寧遂請從事軍中所向馘  
賊以報時總兵官王樸拊之曰儒者勇乃爾乎七年奏  
捷敘功實授守備隨禁旅還居京師時兩廣方用兵兆

香山縣志

卷之七

三十四

寧以部咨赴軍門清剽盤古十八洞賊報功尋又與惠  
陽叅將施王政犄角竝進破沙子下岡諸賊復合楚師  
搗主簿同鐵渠散脅以兆寧功為最授遊擊未幾復從  
總制沈猶龍征九連山八排諸峒設奇制勝多出兆寧  
計畫賊平歷陞叅將轄肇標水兵援勦海上諸寇兆寧  
善用謀進進豫得賊情賊夕聚謀而樓船朝至矣賊以  
是破胆乙酉冬粵西兵起總制知兆寧可任大事獨召  
使畫策乃畫藏其哨船集漁艇溯上流火攻破之晉副  
總兵時溪峒土司蹶張犯隆安寧化諸縣制府以兆寧  
勇畧為諸將冠于是專師西徇多所擒馘丁亥夏率兵  
德慶駐舟楊柳沙與交趾轉戰身被流矢奮躍波中而  
死兆寧起書生雖歷行陣猶手一編不置平生喜畜硯  
次第品藻各有銘識獨一片純白蕉葉寶之逾玉嘗曰  
此吾狗葬物也死時研果衷甲間蓋方戰已自分必死矣

列女列傳

明蘇氏指揮林興妻正統己巳黃蕭養來攻城亂民且附之四境率潰援兵不至時興率屬軍于外孤城危在旦夕蘇氏乃率軍婦登埤拒守矢石待援城賴以完蕭氏女名烏頭娘大攬都華平里人父思敬母區氏烏頭年十八未字景泰元年黃蕭養既平水軍討鄉民之脅從者遂乘機剽掠見女有容色執之脅以利刃烏頭誓死不受辱載還次新會東亭驛將鬻之女曰願祈一死軍怒曰不聽賣視吾刀女曰我豈容若賣人亦豈能買我卽自引頸斂髮受刀遂殺之新會人哀之買棺葬邑西象山成化辛丑知縣丁積命工脩其墓且割廢廟田六十畝命人歲守祀事弘治甲子知縣羅僑以守非其人墓將就湮乃改葬于雷電山陳氏何天祐妻年二十有二夫死子純甫三歲族之貪

暴者利其資思奪陳氏節陳氏艱貞自矢撫育其孤孤已長娶婦鍾氏一年而純暴殞婦鍾有娠僅五月族之貪暴虎視者十倍于前陳以子身孤嫠痛殤兒而撫姪婦呼天搶地力禦強暴及遺腹生數歲而婦鍾又死矣故凡陳之所以保持其孤者又百倍其子也有以毒置糗構誘乳媪啗孤者陳覺之孤得不死則又結大盜夜劫之陳抱孤渡河若有神物乘以濟又得不死自是歲租資產悉為抄奪陳夜則明燈和淚教孤孫讀書晝則挺身至訟庭辯復產宅歷十五年始得還其故孫世睿以垂髫補弟子員高等然後飄搖稍定而巢卵得完其後享年九十餘視其曾孫述忠述瓚皆舉孝廉陳猶健飯及玄孫吾騶起家翰林請于朝旌表建坊祠祀劉氏李孟義妻年二十而孀子賽欿事氏以孝聞正德間建祠旌表曰母貞子孝賽欿奉旨給冠帶

周氏麥文傑妻夫死守節正德間嘗捐銀四百餘兩賑  
饑縣官旌之曰節義雙美

梁氏庠生趙之璧妻年二十五之璧死無子富人謀娶  
之百計不為動壽八十有三崇禎十六年卒  
陳氏黃旗都人張勝祿妻孕三月而夫死以家貧囑父  
母必嫁之陳聞言哀不自勝因剪髮矢志時方十有七  
歲後生子竒巖卒年六十有八

梁氏小攬人性柔順歸何滔二年滔暴卒遺腹一子或  
勸之他適輒慟哭曰一婦二夫行之醜也豈可無耻以  
辱宗範且吾弱息非吾奚依吾一移足門祚將誰保乎  
誓守節年七十嘉靖初官欲表異之氏使從孫止之曰  
吾薄命至此敢要名乎官亦不之強  
梁氏龍眼都人歸高彩二載彩卒梁氏時年二十有二  
遺腹生子應箕堅志守節矢不他適其母流涕風之梁

香山縣志

卷之七

三十六

氏曰姑老子幼忍使之無所歸乎母遂不敢復言嘉靖  
間旌其門曰高節婦卒年六十有九

劉二娘山谿角人邑文學劉靈女也性至孝侍父讀書  
常恨不得為男子建竒節於世年十八未笄萬曆己酉  
三月海賊剽劫攻其廬警迫家人奔潰娘勢蹙不顧身  
力梯其母逾垣脫仍回襁負幼妹為賊執憤激求死罵  
賊賊以刃礪其頸益罵不絕口至石龜頭賊擁之登舟  
適追兵至娘乘間赴水死翌日屍浮從數十里逆流握  
拳嚙齒尚作罵賊狀邑人哀之奉旨旌表建祠  
鄭氏烏石庠生鄭申重女名娟娘年五歲從兄受女論  
語因而知書明大義申重與韋燦我善約為婚姻許聘  
燦我子卓琛年及笄卓琛早夭申重恐娟娘知戒家人  
匿不與聞後知之哭告父母請往奔喪父曰忠孝節義  
惟節最難今汝既欲守節是天下第一難做之事汝獨

做了卽父母亦難沮抑惟是今茲一往不獨為死者起見須要為宗祧起見卜吉而行於事為宜於禮不失娟娘以為其父大義煌煌秉禮君子也日久議變格不得行娟娘以死自誓越一載燦我思子致疾念娟娘為子守節淚嚼其後妻曰我死無子尚可議為我後者若娟娘不歸禮難議繼卓琛為不饗之鬼矣我死後當迎娟娘為我成服死瞑目矣因手書貽申重置筆而逝娟娘泣請奔喪母曰未字而奔翁喪不貽父母譏乎娟娘曰私奔貽辱未聞奔喪守節貽父母譏也語畢闔戶投繯母穴牆入氣將絕踰刻乃甦徐言曰母重苦我始終一死耳母知不可奪許焉翼日韋具輿來迎娟娘入門謁祖拜姑乃易衣髻直而就哭泣之位擇其繼子為翁承重經其喪葬翁遺產甚薄娟娘勤於女紅事後姑曲盡孝道撫繼子慈不掩義四十餘年如一日縣官旌其廬

曰孝節貞操

黃氏庠生黃考功女性柔淑喜讀曹大家女誡諸篇許聘秦建義年及笄建義久病肺娶有日矣而病未瘳及期來迎母曰婿病未愈親迎謂何欲不許女曰為女不幸遠離父母夫豈忍言但受人之聘身卽許人義無再醮遂歸秦恪恭婦道侍湯藥無懈容建義終不起謂黃氏曰卿猶處女也慎勿固執勉事新人侍藥之勞俟諸冥報言訖乃死氏哀毀骨立母欲奪其志以死爭之年六十有三跌坐而逝

楊世詵妻何氏小攬庠士何派東女十九歸世詵二十有一舉二子世詵有異母兄以兄故不得於父蚤死何氏日抱兩孤泣曰未亡人其忍一刻苟活耶顧吾死而兩孤隨之矣翁饒於財而獨於何氏多所靳乃日事紡績以自給子稍長課以詩書派東哀其志構數椽迎歸

何氏載木主攜兩孤往足不逾閩時述已所以忍死之故以勉其子及應童子試仲子以垂髻冠一軍縣以其事上之學使者彙聞於朝旌其廬曰艱貞勁節名載忠孝節義坊中

庠士楊兆公妻何氏小攬羅涌人生而慧數歲能誦詩及長通內則女誠諸書年十九歸兆公事翁姑動止有儀吐詞有則姑姊妹戚屬咸師焉兆公未舉子何氏出奩金為買妾後兆公病肺垂危謂何氏曰命在旦晚倘有不諱如兩尊人何何氏曰妾幼讀禮儀頗明大義夫倘見背理無獨全然妾有身四月矣聞之古人曰仁人必有後如其不然有相從泉下耳兆公卒閱六月而子晉生何氏鞠育顧復之入小學經傳句讀皆口授或偶及忠臣孝子輒能語其大槩翁病侍湯藥顛天願以身代既歿經紀喪葬無鉅細一準於禮晉既長文日益有

香山縣志

卷之七

名受知學使者試輒高等食饌肯入成均及捧徵檄色喜母曰汝欲效毛義故事耶與子偕隱足矣守節三十九年縣官上其事侯旌

梁氏黃梁都人彭澤令梁國棟女年二十適庠生方如暘如暘力學不以寒暑輟梁勤女紅給饗殮暘得一意攻苦無內顧越五年如暘死子博甫三歲稍長教以詩書遇古人忠孝廉節必為之反覆開導孀居三十餘年今六十有奇子博邑庠生

梁氏亦國棟女適前叅將何景道八載而孀勵節教子胤榮讀書成立入邑庠今五十有六歲

劉氏南海人年十七歸小攬庠生何晟道未及一載夫死無子以兄子胤樸嗣氏哀痛不欲生姑勸以存孤大義乃鞠育嗣子如已出凡門戶糧役一切經理之上奉孀姑供祭祀誅耕織撫孤完娶循禮蹈義三十餘年如

一日氏父為南海劉公士斗以名進士為良有司甲申  
變死難是父是女忠節可謂無慚矣

汪氏麻洲人秦勝祐妻也甫娘而勝祐疾篤命工為其  
像授之曰吾命止此幸而生子其善鞠之言畢而逝後  
生子經時年二十有一有勸令改志者泣曰是禽獸我  
也遂不復敢言既去喪佩服皆縞素卒年逾七十

黃氏荔枝山人梁寶卿妻年二十一生一子而寶卿死  
黃氏事孀姑撫幼子至十八歲娶婦生孫而子又死氏  
復撫孤孫每至姑與夫諱日號哭不輟聲勺水不入口  
者竟日典鬻經葬事族人欲奪其山氏願隨夫入塚族  
人義之乃得葬萬曆二十六年壽八十卒

黃氏雍陌人庠生鄭參妻二十一而參死遺腹生子光  
震始終一節

梁氏萬曆二十三年適楊文耿二年文耿死守節六十

香山縣志

卷之七

三十九

餘年八十有五

黃氏乾霧村梁素韞妻二十七夫死或勸之改嫁乃蓬  
首垢面呼天慟哭教子士樸成人居家儉約賓祭則豐  
卒年六十有二

穆氏前世襲指揮穆精輝女前進士丹徒令鄭一岳繼  
室年十八歸一岳歸五年年二十三歲而孀教子劍長  
標長入邑庠今二十八年節操如一日

容氏年十八適翠微韋仁伯半載而仁伯死孀守事姑  
姑死出所積置嘗田建祠俾族人奉祭祀萬曆四十四  
年縣官旌其廬曰節孝可風年八十有二

鄭氏仁厚坊楊璋妻歸歲餘而璋卒遺腹生子桓守節  
六十餘年

楊氏鄭達元妻二十五而寡子宗彥生纔三月家貧守  
節紡績以事祖姑訓子入邑庠孀居四十八年今七十

有二齡

殷氏黃梁都人庠生曹懋周妻年二十二夫亡生子纔五月守節至年七十

楊氏吳茂暉妻永寧街人二十二歲夫死無子家赤貧紡績自給年六十有五

鄺氏南門人庠生趙天挺妻年二十餘天挺死守節教子聯飛入邑庠

劉氏儒士梁子慎妻歸未三月夫死氏時年十八撫嗣子守節三十一年

國朝黃氏適梁敬存生一子二十七歲而孀美姿容人多謀娶之氏曰從一而終婦道也若夫死改適他日何以相見於地下乃蓬首垢面跣足毀容以自誓族人誘其子飲博呼天哀痛切責之遂得悛改順治丙戌卒年六十有二

香山縣志

卷之七

四十

楊氏繆志臯妻歸四載而夫死撫孤子及長為娶婦順治壬辰冬值梁賊變兵寇交集下氏慮污辱偕媳唐氏投井死

方氏名秀貞庠生方天明女年十五許字庠生李棊龍順治乙未歲海寇竊發村鎮多所屠掠秀貞告母曰兒必不得長奉母矣母以為不祥唾之及賊劫濠涌村母子皆被擄秀貞知不免乃給賊令母歸取銀贖已賊信之秀貞度母行既遠遂躍入海中死棊龍聞之哀悼義不娶後數歲亦死

麥氏小攬人庠生黃肇揚妻家貧紡績供膏火客間過飯脫粟雖野菽數莖必整列盪中羹湯瑩然可鑑眉髮田家瓦盤濯磨如彝鼎蓋其性端潔然也癸卯冬十一月官兵方捕蛋船遂掠攬鄉執肇揚去氏與一子三女別掠置戈船中氏散髮號哭不止兵初為好語勸令勿



苦氏憤罵曰狗輩安敢覬我兵怒出利刃加氏頸背曰再哭卽砍汝矣氏曰狗輩殺我我死訴上帝寸磔汝語畢赴水兵挽其髮繫樓櫓間氏私囑其子初晝曰我非捨兒奈不死不能全身異日父當來尋爾兄妹勿戀戀我也遂斷髮赴水兵覺已無及入洪流數丈忽湧立水面猶作憤罵狀兵闕弓射之沉尋又躍出兵又射之遂沒時年三十事定肇揚訴諸上官撫院盧贈金差官訪贖其子女三人還之肇揚感其妻節烈遂誓終身不再娶云

鄭氏庠士盧尚雍妻康熙甲辰二月海寇掠鄉民尚雍以孱書生與顏齡父母弱妻穉子不能支賊皆執之而去母衰病不前賊棄之鄭氏方襁負其子度姑可幸脫卽解釋其子於地目送姑姑乃攜孫逃歸鄭氏誓死不隨賊賊曰我釋汝後復有執汝者第隨我去可贖汝翁

與夫鄭氏曰翁為鄉賓夫為庠士義不受辱後之得釋與否卽翁與夫之得釋與否非所計也觸賊而死譚氏小欖人把總何月客側室也姿容絕世常持經咒不輕言笑時欖鄉已遷寄寓順德碧鑑津口月客從戎戰死輿尸歸氏號泣躬含殮舉木庭中入室沐浴擬自我婦嫗環守之曰奚自苦主翁死不可復生爾非正室固可別為計也手捫其口曰無多言徒污人耳越日乘家人方聚泣總幃中疾馳伏波橋上哀呼投水死梁氏蒲山村陳昌昆妻康熙三年春海寇入村昌昆父子被執賊持刀逼氏隨往氏不從引頸就戮賊殺之

耆壽列傳

凡給授冠帶悉入例授此不更載

明徐伯良字顯人麻洲人生而穎異九歲入邑庠十三歲食餼歷十年以通經貢入成均永樂六年授都察院都事讞獄明允居官六載辭歸家居怡然自樂屢舉鄉飲大賓壽八十三嘉靖間祀鄉賢

游秉忠嘉靖時人隱耕於攬溪年踰耄健行不杖或問以延年之道曰吾惟是正心息慮順物來應任其自為脩短而已壽百有十歲無疾而逝

何東源小攬人志意高遠嘗雅歌縱談酣飲飲已卽信步山水間少壯人隨之恒不能及嘗曰吾有生未始一役其神也卒年九十有八

鄧繼禹北山人年九十歲

劉養素山谿角人年九十六歲刻有懶拙詩草

梁標恭常都人年百有九歲子文煒年九十有九歲

香山縣志

卷之七

四十二

方定儒性孝友捐產百畝為祀田鄉黨有死而無棺者資給之年一百有三歲

陳應義四字都莆山人性伉直遇事有不平嘗面折人聞者皆悅服初號確松里人以其言確且公羣呼曰確公確公少有四方之志及長家居侍養杜門不出父母年俱逾九十確公時已耄猶作兒童戲思得一當親心確公壽七十有九其子疇孫國光俱邑庠

盧志中恭常都人邑庠生性仁厚嘗修盧氏族譜建祠遇朔望大集同姓子弟講孝友睦婣任恤罰其不率者異姓子弟來學不計修脯其為教必先品行而後文藝遊其門者多一時知名士里中推為通都約正縣令表其門曰端儒教子天錫及二孫皆遊邑庠壽七十有五鮑瑞字伯秀子鵬字于洪香山場人父子皆輕財仗義凶年捐賑壽俱至九十餘孫士奇明朝貢士

陳氏義民秦炫母年九十有七炫為人慷慨好義縣令  
王好善遷縣蓮峰使炫任其事乃自捐三百金以襄之  
鄭氏知沙縣事郭尚敬妻年九十有八子良璧八十有  
四拱璧七十有八俱邑庠  
黎氏貢士繆志和之母年一百三歲縣尹姚啓聖題其  
門曰母儀人瑞儒學歐陽羽文旌曰婺星永耀  
鄭氏蓮塘人慈惠恭儉行年九十九蕭蒼之母蒼字省  
吾有孝行享年九十三萬曆四十年知縣但啓元旌其  
齒德俱優

卷之七終

香山縣志

卷之七